



Vegn Bella da spendrar Edward?



Ils nauschs vampirs, entamez il capo Aro.

FOTOS MAO

New Moon – ina dulutschina murdida da mezdi

Nov film d'amur per teenies e dunnas en ils kinos

DA VIOLA PFEIFFER

■ **Ils 25 da november èsi uschè lunsch: Milliuns da giuvnas spetgan dapi in onn sin quest di. Il segund film da la retscha dals romans «twilight» cumpara en ils kinos. E puspè sto Bella Swan batter per sia gronda amur, il vampir Edward.** L'emprim film «Twilight – Bis(s) zum Morgen-grauen» ha finì en armonia assoluta. Exact uschia entschaiva er il segund film «New Moon – Bis(s) zur Mittagsstunde». Bella ed Edward èn inamurads e ventiraivels en il pitschen vitg Forks. Ma Bella è anc adina in carstgaun flaivel, vulnerabel e senza dubi «mouthwatering» per tut ils vampirs. A ses 18avel natalizi capita la disgrazia. Bella è sin visita tar ils vampirs, ella retschaiva in regal e sa taglia vi dal palpieri. Il frar dad Edward sa derscha sin Bella, ed i manca pauc ch'el mazzass ella. Per Edward è quai la cumprovà che Bella è vidlonder meglier senza el e sia famiglia. «Quai è la davosa giada che ti vesas mai», di el cura ch'el prenda cumià e va davent.

In concurrent per Edward?

Per Bella croda il mund ensemen. Ella n'è betg pli sasezza, na s'inscuntra betg pli cun ses amis e la notg sbragia ella en siemi. En fin quel di ch'ella chatta or che il spiert dad Edward cumpara ad ella, sch'ella vegn en ina situaziun privlusa. Il spiert avertescha ed emprova da proteger ella. Il giavisch da Bella da vesair Edward e d'udir el, chatscha ella da ristgar adina dapli. Cun agid da ses ami Jacob Black, in Indian dal pievel dals Quileute, reparescha ella dus vegls motors. Cun quels vul ella charrar uschè da sturnas che Edward cumpara.

Cun la lavur vi dals motors, ma surtut cun l'amicizia da Jacob, entschaiva Bella puspè a viver. Jacob, ch'era già avant inamurà en Bella, gauda quest temp. Ma dad



Bella (Kirsten Stewart) ha gugent Jacob (Taylor Lautner), ma ella charezza in auter.

in di sin l'auter sa mida quai. Jacob na vul para betg pli vesair Bella. È el vegnì en contact cun questa gang da Sam Uley? E tge è cun quests monsters che vegnan adina puspè vesids en ils guauds enturn Forks? Cun il temp vegn Bella a savair in dals pli vegls misteris dals Quileute Indians, in misteri che fa per Bella tut anc pli privlus, cunzunt cura che Edward cumpara puspè en la vita dad ella.

Vampir cun tschera murtirada

«Murdida da mezdi» è in film grondius per tgi che ha gugent bramas d'amur. La camera vegn manada a moda eccellente per exempel durant la chatscha dals vampirs tras il guaud u durant ils mais che passan cura che Bella è abandonada. Tar questas duas scenas è era la musica perfetga. Già en l'emprim film triumfava il soundtrack da

Bands sco Muse, Linkin Park ad Coldplay ed era questa giada pon ins sa legrar sin buna musica.

Er ils giugadurs èn fenomenals, in pli bel che l'auter. Surtut *Taylor Lautner* sco Indianer Jacob Black persvada cun ses talent. Tar ses concurrent *Robert Pattinson* (Edward) ston ins dir che sia mimica è stravigada. El sto segir vesair or sco in pauper vampir murtirà da mal d'amur, ma sto quai esser uschè steric?

Indian cun massa musclas

Ma las aspectaturas vegnan a pardunar quai a Pattinson. Bleras èn già s'inamuradas tar l'emprim film en la figura dad Edward (el è il tip softie, pitend, romantic, à la jau-fatsch-tut-per-tai) e Pattinson è la finala stà il «sexiest man alive 2009». Per tuttas che han pudì resister fin uss a Pat-

tinson porscha «New Moon» ina nova figura plaschaivla: Taylor Lautner n'ha numnadain betg mo in sixpack, na, ins po admirar in eightpack sin la taila glin. 15 kilos massa da musclas ha il giugadur da 16 onns stuì trenar sin ses corp per questa rolla. Tge bel aspect cura che l'Indian tira or ses t-shirt – betg per laschar vesair sias bellas musclas, mabain per fruschar davent il saun a Bella, cura ch'ella è sa disgraziada cun il motor. Ma mintgant ston ins tuttina dumandar: Va questa fatscha giuvna da Lautner insumma a prà cun quest «body»? Ma il character Jacob Black fa, abstrahà da sias musclas, ina super figura. El è quel che fa il film pli luc e pli legher.

Ir senza umens a kino

Ina da las megras scenas è cura che Bella va cun Jacob ed anc in auter giuven ch'è inamurà en ella a kino. Ella sesa tranter ils

dus giuvens, e mintgin spetga ch'ella dettia la manutta ad el. En questa scena musa la giugadura *Kirsten Stewart* ch'ella n'ha betg mo talent per tragica, mabain in bun senn per comica. E lura è ella anc ina dunna attractiva – sco atgnamain tuts en quest film. I na dat gnanca ina solia persuna ch'ins stuess dir ch'ella saja trida. Schizunt las figuras nauschas e malsimpaticas èn bellezza carstgauns u vampirs. Quai fa il film anc pli surreal.

Tuttina, u gist pervi da quai, sa fuin ins gugent en questa terra, surtut sco matta giuvna u insumma sco dunna. In bun tip: Per ir a kino a guardar quest film èsi indigà da laschar a chasa ils umens. Lezs vessan zuar plaschair da vesair Kirsten Stewart ed anc in'entira retscha bellas vampiras, ma ils lungs dialogs d'amur n'èn betg fatgs per aspectatur cun in y-cromosom. Las singulas scenas da cumbat na midan nagut vi da quest verdict.

Vampirs vegetarics fascineschan milliuns

«Twilight» è ina seria da quatter cudeschs sur da Bella ed Edward – in vampir ed ina giuvna dunna. Per tgi che n'enconuscha anc betg la story, qua in pitschen crash-curs:

Vampirs tschitschan saun e mazzan carstgauns. L'autura *Stephanie Meyer* (35 onns) descriva en «twilight» ina famiglia da vampirs che na vulan betg pli esser monsters: La famiglia da Edward ha decida da betg pli baiver il saun da carstgauns, mabain saun d'animals – da viver vegetaric, sco els dian. Fitg difficil per Edward daventi cura ch'el emprenda d'enconuscher Bella. Sia odur è per el sco ina droga. Malgrà ch'igl è per Edward ina tortu-

ra da star enturn ella s'inamureschan ils dus. L'istorgia d'amur tranter Edward e Bella fascinescha milliuns da lecturs e cunzunt da lecturas. Ils romans han cuntanschì in dumber d'ediziun da 26 milliuns.

I dat in veritabel hype enturn ils cudeschs, films e giugadurs. Perfin figuras da barbie pon ins già cumprar. Las illustradas speculeschan davart ina affera tranter Robert Pattinson e Kirsten Stewart, cunzunt uss curt avant il segund film. Quai numnan ins publicity. Dasperas n'avessan quest film ed ils cudeschs gnanca da basegn quai. Igl è bellezza e dulutschinas istorgias senza ch'ils giugadurs vegnian mulestads.



Jacob spendra Bella ord las undas mortals.



Memia bel per esser vair. In siemi da mattatschas.